

痘

子

真

傳

古吳葉

天士先生鑒定
子容先生著

定

痘疹指南醫案

乾隆壬寅春鐫

附刻痧論痧賦

衛生堂藏板

痘學真傳序

古以醫卜農圃爲技之最小并不
列於六藝之中於乎謬矣卜與農
圃并可也醫寄人之生死聖賢原
有通微之理而固可謂之小技也
乎至於痘學尤醫中之最難而人

生百病之最初者如蒙養然也蒙
以養正而聖功卽具於此故古者
小學禮樂射御書數之內精義入
神寓焉聖人依仁之後猶不廢游
藝始終本末一以貫之矣夫人稟
氣於父母而生襁褓以至孩提猶

少物感而痘卽中焉此非病也稟
也特感天時之氣而發於外耳稟
固不可不慎其所養而業之不專
學之不精其不以庸誤穉兒者亦
已鮮矣蓋氣有清濁厚薄之等雜
揉於中而補偏救弊涵泳以歸於

中正亦猶蒙養之於作聖者然也
黃庭曰上有關元下有命門乃道
家鍊氣之關鍵而痘之爲症自關
元命門而出不謂之稟而謂之病
不可也故學是術者不謂之理而
謂之技亦不可也錫山葉子子容

以是學名於三吳三吳之櫻兒賴
以全者以千百數計業之專而學
之工其不以庸誤櫻兒者哉今將
廣是以救天下著爲成書余時司
馬晉陵屢過錫而葉子以年家子
請序於余余與其學而并嘉其廣

之之志故爲是說以告天下之學
醫者楚黃奚祿詒蘇嶺父撰



序


今代深明醫理者少概以術視之不知其道始於神農氏黃帝岐伯起而相與究咨臻厥壺奧著爲素問難經諸書以垂後世甚矣百病之所由生性命之攸關死生之介判在幾微不可不慎也大約醫莫難於婦人又莫難於小兒而小兒之痘疹尤爲要症載在方書非一家

言然求其施之歷驗而應手奏功亦未
易言哉若葉子子容痘學真傳一書是
誠可寶也余素不諳痘之一症始於何
代發於何因然習聞子容爲梁谿明醫
又習聞其善痘症而技至神能變逆而
險變險爲順有造化在手之妙通國之
人能詳之歲次辛亥余長孫方患痘亦
在危急未知所措得子容審症定方不

數劑而輒安至今神氣之旺相所藉藥餌保護之功居多焉噫亦誠異矣蓋葉子先折節儒業而乃精於醫故其理明學貫洞徹經絡臟腑之表裏又參之以天時之寒暑陰陽與夫地勢之高下燥濕人事之調宜得失無不熟悉其大端以此而著之於書先之以運氣諸論次以痘症之次第計日爲圖又附今古之

案而終之以方藥可謂詳且備矣歷代
如仲景河間丹溪東垣諸子類皆出於
儒者余謂子容進乎道矣非深於儒者
不能爲是書也寧僅仁術云乎哉

雍正壬子立秋日年家眷弟吳綺書於
嘉樹堂



叙

余讀宋外史服錢君仲陽醫學之備及攷其軼事
知其三歲時父東遊海上不復返長奉姑訓號泣
跡父於荒漠之濱歷二十年而後得見迎還以養
因喟然歎興以爲古之以術業傳世者匪獨其術
業之過人云爾殆積乎情性之原立乎行義之大
出其緒餘以濟當世誠有所自本非苟焉已也余
於葉子子容益信子容與余同爲鵝湖華氏甥始
見之時樸訥不及中人繼與之交益冲然以淳穆

然以遠少年博涉文史不屑屑于時退而講岐黃
之學操以活人人咸賴以活每念痘症爲患最酷
因著真傳一書明於陰陽合散初末順逆經絡傳
變之理瞭然如造父之御車公孫之舞劍也予獨
知子容之學蓋有其本焉昔其尊慈疾大劇剖股
調藥祝以身代其莖也隴丘高築豐碑深刻不以
貧窶儉其親嘗悼先塋淪沒乃陟岡踰險搜剔三
百餘年列祖之墓於荒烟蔓草中傾貲以復舊觀
輯家乘以清宗裔居恒撫孤恤寡薦友念舊皆由

一本以推子容蓋天資孝友人也天下未有簡薄
於情性之原苟且於行義之大而術業有成者假
或有之立名非真根本先撥當世且有以議其後
也子容爲人殆與仲陽頡頑寧弟阻東垣之膏腴
繼倉公之衣鉢而已哉昌黎有云化當世莫若口
傳來世莫若書今其書已公諸海內天下後世必
有知之者余不復贅稱其學而推其學之所本以
著其性情行義之大過乎今人如此匪敢爲私戚
阿所好也表弟秦鉞序

葉子容先生痘學真傳引

古來有真學術然後有真事功故立言者第患不
真耳夫通三才者曰儒今操觚家僅知高者爲天
厚者爲地耳目口鼻者爲人而已試問以天經地
義及人道之所當然恐茫乎未有以應也醫與儒
原非兩途不明乎升沉往復盈虛消長之理不可
以爲醫不明乎剛柔平險燥濕寒煖之異不可以
爲醫不明乎強弱虛實窮通得失智愚賢不肖之
殊不可以爲醫自漢唐宋而下儒術詭異醫理舛
錯求醫於儒之中未可得醫求儒於醫之中或可

得儒也某少習經史伊吾有年但所學不能投世
好卒困於儒乃上究軒岐下窺張李及諸名家著
述廣搜博覽採輯成編然猶未敢自信也壬子秋
杪得先生所著痘學真傳伏而誦之賞心快意讀
竟乃大歎服以爲海內著述大抵模糊影響徼倖
成功烏能闡明大道發揮至理如先生者哉先生
之書小中見大淺中見深窮天人之蘊通性命之
原接跡盧扁追踪和緩何多讓焉挾此以往可以
燮陰理陽調元贊化爲真醫斯爲真儒矣其有功
於天下後世大矣哉桃源小友鄧淵保識

刻痘學真傳序

立言之家有可已而言之有不得已而言之今之爲詩詞爲古文者多飭卷成書字畫莊楷鏤刻工嫩若可觀及讀其辭往往掇拾剽掠凌雜汎濫無所得於心不能明乎道徒以爲著書行世有識者輒吐棄之惟恐後吾謂皆可以已也夫立言非矜其能文云爾明乎聖賢之心亦庶幾足以發明其道恐吾知之而人或莫知也恐於今能言之而後之莫聞也爲書以傳於後不敢自私其所得矻矻